

## Акафист святителю Димитрию, митрополиту Ростовскому, чудотворцу

### Кондак 1

Возбранный чудотворче и изрядный угодниче Христов, многоцелебный чудес источниче, неисчерпаемая благодати ходатаю, теплый молитвенниче, великий святителю Христов Димитрие, яко имеяй дерзновение ко Христу Богу нашему, от всяких нас бед свободы зовущих: Радуйся, Димитрие, новый и великий чудотворче.

### Икос 1

Ангел нравом, аще и человек естеством был еси, святителю Димитрие: от самых бо младых ногтей ум твой, пренебрегши земная, в небесная вперил еси, и плоть нося, о плоти не радил еси. Темже и вселися в тя Пресвятый Дух, егоже тя обиталищем быти уведевше, похвальная восписуем ти: Радуйся, незлобием твоим Агнца, прореченнаго Исаем, подражавый; Радуйся, милосердием нищия пропитавый. Радуйся, воздержанием Ангелов удививый; Радуйся, постом и молитвою плоть твою удручивый. Радуйся, к подвластным чадолюбивым отцем бывый; Радуйся, страждущия сердоболием утешивый. Радуйся, вместо тленных нетленная стяжавый; Радуйся, небесный человек. Радуйся, земный Ангеле; Радуйся, Духа Святаго сосуде избранный. Радуйся, православия ревнителю; Радуйся, душепагубных расколов искоренителю. Радуйся, Димитрие, новый и великий чудотворче.

### Кондак 2

Видяще обильную реку чудес и исцелений, от святых твоих мощей истекающую, благоговения и радости исполнеся, благодарим Бога, прославляющаго святых Своих, Ему же и о тебе вопием: Аллилуиа.

### Икос 2

Разум истиннаго богословия внушая чадам Христовым церкви, златословесными поучениями утверждал еси, еретическую же раскольников, привлекая к спасительному единомыслию, в заблуждениях обличал еси, за таковое твое о душах наших попечение взываем ти сице: Радуйся, таинниче Пресвятыя Троицы; Радуйся, проповедниче неисчетных

чудес Божиих. Радуйся, апостольских преданий блюстителю; Радуйся, брынских душегубцев победителю. Радуйся, пламеню, ереси пожигающий; Радуйся, гrome, устрашающий соблазняющия. Радуйся, свеще, Богом возженная, мрак нечестия разгоняющая; Радуйся, звезде, путь ко спасению показывающая. Радуйся, тимпане, Божию славу бряцай; Радуйся, органе Духа Святаго. Радуйся, православия ревнителю; Радуйся, душепагубных расколов искоренителю. Радуйся, Димитрие, новый и великий чудотворче.

### Кондак 3

Силою благодати Божия еще во временной жизни приял еси власть, святе Димитрие, недуги исцеляти и бесы изгоняти; по смерти же твоей наипаче прослави тебе всемогущий Бог многими чудотворениями, да вси, взирая на сие, усердно притекают ко исцелению тобою от недугов телесных, а паче душевных. Богу же вопиют: Аллилуиа.

### Икос 3

Имея неусыпное попечение о спасении душ, вверенных тебе от Бога, святителю Димитрие, пастырски к душеспасительной жизни и словом и самым делом, показуя неленостный подвиг в подражании святым Божиим, непрестанно наставлял еси. Сего ради прими от нашего усердия достойная похвалы тебе: Радуйся, пастырю добрый, заблуждающих по горам суемудрия взыскавый; Радуйся, благий рабе и верный, данный тебе от Господа талант усугубивый. Радуйся, делателю винограда Христова; Радуйся, благочестия столпе неподвижимый. Радуйся, твердое забрало Христовы церкви; Радуйся, щите, защищай благочестие. Радуйся, мечу острейший, посекаяй злочестие; Радуйся, непоколебимое православия основание. Радуйся, твердый каменю веры; Радуйся, кормило церковное, управляющее верных к тихому пристанищу. Радуйся, православия ревнителю; Радуйся, душепагубных расколов искоренителю. Радуйся, Димитрие, новый и великий чудотворче.

### Кондак 4

Буря ересей от преисподних, чрез Ария по Греции возродившаяся, а в последняя лета проискама Мартина Арменина чрез брынских скитона начальников возникшая в нашем Отечестве, готова была опровергнуть тишину единых, Святыя Соборных и Апостольских Церквей; ты же пастырь добрый, положивый душу твою за овцы, прогнав оных душепагубных волков, бурю суемудрия укротил еси, верных же научил еси

Триипостасному Богу взывати: Аллилуиа.

#### Икос 4

Слышаша суемудреннии раскольницы твое к ним изобличение, еже ты, болезнуя о сердечном их заблуждении, написал еси, возбесишася зело, и множество из них вместо должнаго исправления адский пламень изрыгнута на тя; ты же, яко твердый адамант, под ударами злобы и ненависти не изменился еси. Сего ради Церковь Святая блажит тя приветствии сими: Радуйся, Ангелов сожителю; Радуйся, Апостолов преемниче. Радуйся, святителей сопрестольниче; Радуйся, российский златоусте. Радуйся, Спиридону, Великому Василию, Григорию Богослову и прочим великим святителям единокостне; Радуйся, Николаю Мирликийскому и Мелетию Антиохийскому единокостне. Радуйся, преподобных собеседниче; Радуйся, монахов и постников наставниче. Радуйся, мучеников удобрение; Радуйся, праведных украшение. Радуйся, православия ревнителю; Радуйся, душепагубных расколов искоренителю. Радуйся, Димитрие, новый и великий чудотворче.

#### Кондак 5

Боготечная звезда явился еси в течении твоём, еже ты совершал еси, свое устроая спасение; примером же верных души назидая, научил еси благоприятно пети Богу: Аллилуиа.

#### Икос 5

Видевше ангельстии чинове еще во временной жизни великие твои подвиги во всяком благочестии и чистоте, удивляхуся, прославляюще человеколюбца Бога, немощное человеческое естество подкрепляющаго. Мы же тя, усердно любовию почитающе, чествуем похвалами сими: Радуйся, луча Трисолнечнаго Света; Радуйся, светильниче, на свещнице церковном поставленный. Радуйся, светило, путь правый показующее; Радуйся, воине Христов непобедимый. Радуйся, Единосущныя Троицы истинный поборниче; Радуйся, уста еретическая заградивый. Радуйся, златословесными устами небесныя истины вещаяй. Радуйся, вся своя имения по словеси Господню продавый. Радуйся, единого бесценного бисера Христа Господа снискавый. Радуйся, в мале быш верен, над многими поставленный. Радуйся, православия ревнителю; Радуйся, душепагубных расколов искоренителю. Радуйся, Димитрие, новый и великий чудотворче.

### Кондак 6

Проповедник немолчный тайны Пресвятыя, Единосущныя и Неразделимыя Троицы был еси. Сего ради проповедует Россия величия Божия, показанная на тебе, святителю Димитрие, яко приял еси дар целити недуги душевные и телесные, да вси едином сердцем и едиными усты воспеваем Богу: Аллилуиа.

### Икос 6

Возсия в возлюбленной Богом душе твоей блистающий истинного боговедения свет на освящение и просвещение верных, егоже с сладостию внимающий спасительному учению твоему видяще, верно познаем, яко и в единонадесятый час пришедый, равный с древними святыми и богоносными отцы динарий приял еси. Темже восхваляем тя сице: Радуйся, вместилище добродетелей; Радуйся, достойное святыни жилище. Радуйся, море, нечестие мира потопившее; Радуйся, крине благоуханный, чудесно процветший. Радуйся, сокровище медоточных учений; Радуйся, уневестивый душу твою жениху Христу. Радуйся, смирения Его истинный подражателю; Радуйся, иноческую нищету до конца сохранивший. Радуйся, вшедый с мудрыми в радость Господа твоего; Радуйся, благовоние Духа Святаго. Радуйся, православия ревнителю; Радуйся, душепагубных расколов искоренителю. Радуйся, Димитрие, новый и великий чудотворче.

### Кондак 7

Хотя достойным образом совершити подвиг, возложенный на тя от Бога, первее укреплял еси свою душу прочтанием жития святых, предполагая себе подражание оным; таже почувствовав пользу, из того проистекающую, не обленился еси быти описателем жизни тех, с нимиже ныне в невечернем свете ликуеши, воспевая Богу: Аллилуиа.

### Икос 7

Новаго тя о нас молитвенника, целителя душ и телес и ходатая нам спасения вечнаго стяжахом; но благодарным сердцем и усты Богу, толикаго чудотворца в наши времена даровавшему, достойно воспети не могуще, тебе, святителю и великий угодниче Христов Димитрие, похвальная дерзаем приносить сице: Радуйся, всем скорбящим приятное попечение; Радуйся, скорый от всякия болезни и безмездный врачу. Радуйся, злых помыслов прогонителю; Радуйся, яко твоими молитвами слепые прозреша. Радуйся,

яко твоим ходатайством хромые и безногие ходити начата; Радуйся, яко тобою от многих бесове отгнашася. Радуйся, яко твоим заступлением расслабленные исцелеша; Радуйся, ломотныя и опухлыя уврачевавый. Радуйся, трясавичных и огневичных болезней целебниче; Радуйся, от неисцельных водяных и каменных болезни здрави возставивый. Радуйся, православия ревнителю; Радуйся, душепагубных расколов искоренителю. Радуйся, Димитрие, новый и великий чудотворче.

### Кондак 8

Странно недугом неверия одержимом видети, како в мертвенном теле и тленном возможно ангельское проходити житие непреткновенно, и по успении от единого с верою прикосновения к телу, нетлением почтенному, дивная совершаются; мы же на тебе, святителю Димитрие, новое чудес всемогущаго Бога событие слышаще и видяще, молитвами твоими врачуеми, взываем Ему: Аллилуиа.

### Икос 8

Весь распалившись искреннею любовию к Богу, всего себе предал еси воле Его; и вся вещественная и тленная вменив уметы быти, духом, душею и сердцем возжелел еси наслаждаться лицезрением Божиим; но ныне вся потребная тебе в вечность испросил еси, не забуди и нас, требующих твоего заступления и ходатайства, да тем паче похвальная восписуем ти: Радуйся, Богу совершенно угодивый; Радуйся, венец безсмертия жизни получивый. Радуйся, насыщаяйся Божия благодати; Радуйся, Пророками за объяснение их писаний похваленный. Радуйся, Апостолами за последование их стопам ублаженный; Радуйся, святителями за единомысленную с ними ревность прославленный. Радуйся, мучениками за списание страданий их увенчанный; Радуйся, преподобными за подражание им во всяком благочестии и чистоте постом и молитвою к лику их причтенный. Радуйся, праведниками за высочайшее твое смирение и труды превознесенный; Радуйся, от всех святых радостными приветствиями усретанный. Радуйся, православия ревнителю; Радуйся, душепагубных расколов искоренителю. Радуйся, Димитрие, новый и великий чудотворче.

### Кондак 9

Всякия беды, скорби и напасти избавляй нас, свято Димитрие, твоими к Богу теплыми молитвами и потщися даровати нам временная благая, к жизни потребная, и вечная, да с тобою купно в селении праведных воспоем

Богу: Аллилуиа.

### Икос 9

Витийство человеческое не возможет изрещи довольно количество благодати Божия, излианныя на тебе, святе Димитрие; но любовию твоею побеждаеми, дерзаем воспевати тебе: Радуйся, насадителю благих; Радуйся, искоренителю злых. Радуйся, чистоты селение; Радуйся, печальных утешение. Радуйся, отчаянных заступление; Радуйся, сирот питателю. Радуйся, обидимых предстателю; Радуйся, преподобия и правды истинный хранителю. Радуйся, пресветлый столпе облачный, просвещай множеством чудес; Радуйся, облаче росоносный, погашаяй пламень страстей, Радуйся, православия ревнителю; Радуйся, душепагубных расколов искоренителю. Радуйся, Димитрие, новый и великий чудотворче.

### Кондак 10

Спаси хотя душу, о плоти твоей нерадил еси, но постом, бдением молитвами и непрестанными трудами плоть твою удручил еси, яко в тимпане, во умервщлении телесе благоприятно Богу вопия: Аллилуиа.

### Икос 10

Стена еси, ограждающая от всех бед, усердно ты в помощь призывающих, святителю Димитрие, яко во всех странах Российския державы ясно проповедаются обильныя чудеса, бывшая у цельбоноснаго твоего гроба. Сего ради ублажаем тя сими: Радуйся, чаша, источающая нам елей милости Божия; Радуйся, больных исцеление. Радуйся, немощных подкрепление; Радуйся, страждущих скорая помощи. Радуйся, претыкающихся о камень соблазна наставниче. Радуйся, обидимых заступниче. Радуйся, омраченныя просветивый; Радуйся, просвещенныя утвердивый. Радуйся, расточенная собравый; Радуйся, к небесному немерцающему свету направивый. Радуйся, православия ревнителю; Радуйся, душепагубных расколов искоренителю. Радуйся, Димитрие, новый и великий чудотворче.

### Кондак 11

Пение немолчное принесл еси Пресвятей Троице, святе Димитрие, ово мыслию, ово гласом, ово словом, ово благодетельствованиями. И ныне предстою Престолу Божественному, моли о воспевающих о тебе: Аллилуиа.

## Икос 11

Светозарное твое учение, ум небесный являющее, подтверждаемое ныне нетлением мощей твоих и множеством чудес, явное и действительнейшее средство дарова человеколюбивый Бог на обличение еретичествующих и на утверждение православных; ныне святым и медоточным твоим учением упоенные, с благодарным чувствием вопием ти: Радуйся, учителю премудрый; Радуйся, пастырю предивный. Радуйся, исповедниче непоколебимый; Радуйся, око слепым. Радуйся, нога хромым; Радуйся, рука беспомощным. Радуйся, главо, наполненная небесным учением; Радуйся, ластовице богоглаголивая. Радуйся, источник златоструйный; Радуйся, цевнице духовная. Радуйся, православия ревнителю; Радуйся, душепагубных расколов искоренителю. Радуйся, Димитрие, новый и великий чудотворче.

## Кондак 12

Благодать, данная ти от Бога, целити недуги телесные и душевные, святе Димитрие, созывает отсюда почитающих явление твое и чающих тобою получить просимое от Бога. Темже и мы, припадая со умилением молим тя, избави нас от зол греховных, да благодарно Ему воспоем: Аллилуиа.

## Икос 12

Поюще твоя чудеса, святителю Димитрие, восхваляем Бога, даровавшего тебе таковыя силы исцелений. Ты же не возгнушайся нас, грешных и недостойных рабов Его, но услыши нас, во умилении вопиющих тебе сице: Радуйся, света неприступнаго зрителю; Радуйся, жениху Христу светел светильник сохранивый. Радуйся, душевредное уныние от себе истребивый; Радуйся, жестоким путем райских селений достигший. Радуйся, нищетою богатыя стяжавый; Радуйся, смирением получивый высокая. Радуйся, теснотою пространство вечное снискавый; Радуйся, поношением Христа ради вечную с ним славу приявый. Радуйся, от Святыя Троицы увенчанный; Радуйся, не гаданием, но лицом к лицу Бога смотряый. Радуйся, православия ревнителю; Радуйся, душепагубных расколов искоренителю. Радуйся, Димитрие, новый и великий чудотворче.

## Кондак 13

О великий святителю Димитрие, расколов и ересей искоренителю, прими сие похвальное пение и моли Всемогущаго умирить мир и спасти души

наша, всех православно Триипостасному Богу вопиющих: Аллилуиа.

(Этот кондак читается трижды)

### Икос 1

Ангел нравом, аще и человек естеством был еси, святителю Димитрие: от самых бо младых ногтей ум твой, пренебрегши земная, в небесная вперил еси, и плоть нося, о плоти не радил еси. Темже и вселися в тя Пресвятыи Дух, егоже тя обиталищем быти уведевше, похвальная восписуем ти: Радуйся, незлобием твоим Агнца, прореченнаго Исаем, подражавый; Радуйся, милосердием нищия пропитавый. Радуйся, воздержанием Ангелов удививый; Радуйся, постом и молитвою плоть твою удручивый. Радуйся, к подвластным чадолубивым отцем бывый; Радуйся, страждущия сердоболием утешивый. Радуйся, вместо тленных нетленная стяжавый; Радуйся, небесный человек. Радуйся, земный Ангеле; Радуйся, Духа Святаго сосуде избранный. Радуйся, православия ревнителю; Радуйся, душепагубных расколов искоренителю. Радуйся, Димитрие, новый и великий чудотворче.

### Кондак 1

Возбранный чудотворче и изрядный угодниче Христов, многоцелебный чудес источниче, неисчерпаемая благодати ходатаю, теплый молитвенниче, великий святителю Христов Димитрие, яко имеяй дерзновение ко Христу Богу нашему, от всяких нас бед свободи зовущих: Радуйся, Димитрие, новый и великий чудотворче.

### Молитва первая

О предивный и преславный чудотворче Димитрие, исцеляй недуги человеческия! Ты неусыпно молиши Господа Бога нашего о всех грешных: молю убо тя, буди ми ходатай пред Господем и помощник на преоборение страстей ненасытных плоти моя и на одоление стрел сопротивника моего диавола, ими же уязвляет немощное сердце мое и, аки гладный и лютый зверь, алчет погубити душу мою. Ты, святителю Христов, моя ограда, ты мое заступление и оружие! За твоим содействием сокрушу вся во мне сопротивная воле Царя царствующих. Ты, великий чудотворче, во дни подвигов твоих в мире сем ревнуя о православной Церкви Божией, яко истинный и добрый пастырь, неблаженно обличал еси грехи и невежества людския, и уклонивших-ся от стези правды в ереси и расколы наставлял еси на путь жизни, да непреткновенно пойду по стези заповедей Божиих и



неленостно поработаю Господеви моему Иисусу Христу, яко единому Владыце моему, Искупителю и праведному Судии моему. К сим же припадая, молюся ти, угодниче Божий, егда изыти души моей из телесе моего, избави ю от темных мытарств: не имам бо добрых дел ко оправданию моему: не даждь сатане возгордиться победою над немощною душою моею. Избави ю от геенны, идеже плач и скрежет зубов, и святыми молитвами твоими сотвори мя причастника Небеснаго Царствия в Троице славимаго Бога, Отца и Сына и Святаго Духа. Аминь.

### Молитва вторая

О всеблаженне святителю Димитрие, великий угодниче Христов, златоусте Российский, услыши нас грешных, молящихся тебе, и принеси молитву нашу к милостивому и человеколюбцу Богу, Емуже ты ныне в радости святых и с лики Ангел предстоиши; умоли Его благоутробие, да не осудит нас по беззакониям нашим, но да сотворит с нами по милости Своей, испроси нам у Христа и Бога нашего мирное и безмятежное житие, здравие душевное и телесное, земли благоплодие и во всем всякое изобилие и благоденствие, и да не во зло обратим благая, даруемая нам от щедрого Бога, но в славу Его и в прославление твоего заступления. Даруй нам богоугодно прейти поприще временныя жизни: избави нас воздушных мытарств и настави нас на путь, ведущий в селения праведных, идеже празднующих глас непрестанный, зрящих Божию лица неизреченную доброту; Церковь же Святую от ересей и расколов сохрани, верных укрепи, заблуждающих обрати и всем даруй вся, яже ко спасению и славе Божией подобающая. Отечество твое сохрани от врагов ненаветно, но поборай оружие крестоноснаго воинства, и подаждь нам всем твое архипастырское и святое благословение, да оным осеняеми, избавимся от козней лукаваго и избегнем от всякия беды и напасти; услыши моление наше, отче Димитрие, и моли непрестанно о нас Всесильнаго Бога, славимаго и поклоняемаго в трех ипостасех, Емуже подобает всякая слава, честь и держава во веки веков. Аминь.

### Молитва третья

О святителю Димитрие, великий угодниче Христов, златоусте Российский! Услыши нас грешных, молящихся тебе, и принеси молитву нашу к Человеколюбцу Богу о рабах Божиих (имена). Умоли Его благосердие, да не осудит нас по беззакониям нашим, но да сотворит с нами по милости Своей. Испроси нам у Христа Бога нашего мирное и безмятежное житие, здравие душевное и телесное. Даруй нам богоугодно

прейти поприще временная жизни: избави нас от воздушных мытарств и настави нас на путь, ведущий в селения праведных; подаждь нам твое архипастырское и святое благословение, да оным осеняеми, избавимся от козней лукаваго и избегнем от всякой беды и напасти. Услыши моление наше, отче Димитрие, и моли непрестанно о нас Всесильнаго Бога, славимаго и покланяемаго в трех ипостасех, Емуже подобает всякая слава, честь и держава во веки веков.

#### Молитва четвертая

О предивный и преславный чудотворче Димитрие, исцеляяй недуги человеческия! Ты неусыпно молиши Господа Бога нашего о всех грешных: молю убо тя, буди ми ходатай пред Господем и помощник на преоборение страстей ненасытныя плоти моя и на одоление стрел сопротивника моего диавола, имиже уязвляет немощное сердце мое и, аки гладный и лютый зверь, алчет погубити душу мою. Ты, святителю Христов, моя ограда, ты мое заступление и оружие! За твоим содействием сокрушу вся во мне сопротивная воле Царя царствующих. Ты, великий чудотворче, во дни подвигов твоих в мире сем ревнуя о православной Церкви Божией, яко истинный и добрый пастырь, неблаженно обличал еси грехи и невежества людския, и уклонившихся от стези правды в ереси и расколы наставлял еси на путь истины. Споспешествуй убо и мне исправить кратковременный путь жизни моей, да непреткновенно пойду по стези заповедей Божиих и неленостно поработаю Господеви моему Иисусу Христу, яко единому Владыце моему, Искупителю и праведному Судии моему. К сим же припадая, молюся Ти, угодниче Божий, егда изыти души моей из телесе моего, избави ю от темных мытарств, не имам бо добрых дел ко оправданию моему, не даждь сатане возгордиться победою над немощною душою моею. Избави ю от геены, идеже плач и скрежет зубов, и святыми молитвами твоими сотвори мя причастника небеснаго царствия в Троице славимаго Бога, Отца и Сына и Святаго Духа. Аминь.